

OPĆINA
ILIDŽA

INFORMATIVNI BILTEN

Januar 2019. / Broj 179



**Prezentovan projekat
“Uspostava i održavanje
podataka adresnog registra
na području općine Ilidža”**



**Stipendije za 168 učenika i 52
studenta slabijeg imovinskog
stanja i 40 stipendija za djecu
bez roditelja**



Usvojen Nacrt Odluke o usvajanju Regulacionog plana „Riverina - Sastavci“ i Nacrt Odluke o provođenju Regulacionog plana „Riverina - Sastavci“

Općinsko vijeće Ilidža na 22. sjednici održanoj 31. januara 2019. godine u Multifunkcionalnoj sali utvrdilo je Nacrt Odluke o usvajanju Regulacionog plana „Riverina - Sastavci“ i Nacrt Odluke o provođenju Regulacionog plana „Riverina - Sastavci“

i isti uputilo na javnu raspravu u trajanju od 30 dana. Zadužuje se Služba za prostorno uređenje da u saradnji sa Zavodom za planiranje razvoja Kantona Sarajevo organizuje i provede javni uvid i javnu raspravu. Zadužuje se Služba za prostorno uređenje da u sa-

radnji sa Zavodom za planiranje razvoja Kantona Sarajevo podnese izvjestaj o rezultatima javne rasprave i pripremi Prijedlog Odluke o usvajanju i provođenju Regulacionog plana „Riverina - Sastavci.“ ■



Donesena Odluka o pristupanju izradi Regulacionog plana „Groblje Vlakovo“

Općinsko vijeće Ilidža donijelo je Odluku o pristupanju izradi Regulacionog plana „Groblje Vlakovo“. Površina obuhvata iznosi 125,4 ha. Izradi Plana pristupa se na temelju Izmjena i dopuna Prostornog plana Kantona Sarajevo–Faza B, za period 2003. do 2023. godine, Urbaniističkog plana Grada Sarajeva, za urbano područje Sarajevo, za period 1986-2015.godine i Regulacionog plana „Groblje Vlakovo“. Izgradnja infrastrukturnih objekata na groblju Vlakovo nije tekla prema planskim odrednicama, došlo je do odstupanja

od usvojenog koncepta RP-a iz 1990. godine. Novim Planom potrebno je usaglasiti izvedeno stanje sa planiranim rješenjem na način da se obezbijede uslovi za proširenje kapaciteta u skladu sa potrebama za većim brojem grobnih mjesta. Sredstva za pripremu i izradu Plana u okvirnom iznosu od 32.000,00 KM obezbijedit će Općina Ilidža, kao nosilac pripreme iz Budžeta za 2019. godinu. Nosilac pripreme za izradu Plana je načelnik Općine Ilidža. Nosilac izrade Plana je Zavod za planiranje razvoja Kantona Sarajevo. ■

Amar Bungur položio zakletvu

Na prijedlog SDA, za člana Komisije za zaštitu ljudskih prava, predstavke i prijedloge izabran je Muhamed Čenanović, umjesto Faruka Muharemovića, a na prijedlog DF-a umjesto dosadašnjeg člana Komisije za obrazovanje, kulturu, fizičku kulturu i pitanja mladih Emne Milišić imenovan je Saša Planinčić. Umjesto Elvisa Vrete vijećnika Naše stranke koji je sada poslanik u Skupštini Kantona Sarajevo novi vijećnik je Amar Bungur, koji je položio zakletvu na 22. sjednici Općinskog vijeća. ■



REDOVNA SJEDNICA OPĆINSKOG VIJEĆA

Saglasnost na Plan i Program održavanja, zaštite, rekonstrukcije i izgradnje lokalnih i nerazvrstanih cesta

Vijeće je donijelo zaključak o davanju saglasnosti na Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2019. godinu. Zakonom o cestama Federacije BiH uređen je pravni položaj javnih cesta, upravljanje, građenje, održavanje i ustupanje radova, zaštita cesta i uslovi odvijanja prometa na cestama, finansiranje kao i druga bitna pitanja značajna za općinu na nivou lokalnih i nerazvrstanih cesta. Odredbama Odluke o razvrstavanju vangradskih cesta na području Kantona Sarajevo utvrđene su lokalne ceste na području općine Ilidža. Sve ceste koje nisu razvrstane u jednu od kategorija javnih cesta su nerazvrstane ceste i u nadležnosti su Općine. Ovim planom i programom utvrđen je obim, vrsta, vrijednost i dinamika izvođenja radova na održavanju, zaštiti, rekonstrukciji i izgradnji lokalnih

i nerazvrstanih cesta u skladu s planiranim budžetskim sredstvima, a bazirano je na realnim potrebama normalnog funkcionisanja saobraćaja i na konsultacijama i prijedlozima organa mjesnih zajednica i finansijskim mogućnostima Općine kroz budžet za 2019. godinu, a provodi se kroz

program ljetnjeg i zimskog održavanja lokalnih i nerazvrstanih cesta. Redovno održavanje planirano je za 409,77 kilometara putnih pravaca koji su u nadležnosti Općine Ilidža, a obuhvaćene su sve lokalne ceste u dužini od 129,235 i nerazvrstane u dužini od 280.54 kilometara. ■



Informacije

Vijeće je razmatralo i Informaciju o stanju i aktivnostima u oblasti rada sa mladima, sporta i kulture u 2018. godini. U Informaciji je istaknuto da se kreiranje i razvoj omladinske politike Općine Ilidža temelji na Zakonu o mladima Federacije BiH, preporukama relevantnih evropskih dokumenata i Rezolucije o mladima u BiH, te da je Općina budžetom za 2018. godinu planirala posebnu budžetsku liniju namijenjenu mladima u iznosu od 174.000 KM. Vijeće je primilo

k znanju i Informaciju o nabavci video nadzora na području općine Ilidža, uz zaključak kojim se zahtijeva da Ministarstvo unutrašnjih poslova Kantona Sarajevo u roku od sedam dana Općinskom načelniku dostavi pisane primjedbe na prijedlog sporazuma o nabavci i prenosu u vlasništvu video kamera i opreme za video nadzor MUP-u Kantona Sarajevo, regulisanju međusobnih prava i obaveza u vezi sa instaliranjem i održavanjem sistema video nadzora na teritoriji



općine Ilidža kako bi se otklonili eventualni nedostaci i isti potpisao. Jedna od informacija bila je inicijativa o bratimljenju općina Rožaje (Crna Gora) i Ilidža. ■



Usvojen Akcioni plan za realizaciju strategije razvoja lokalnih cesta za period 2019-2021. godine

Općinsko vijeće je usvojilo Akcioni plan za realizaciju strategije razvoja lokalnih cesta za period 2019-2021. godine. Akcioni plan je baziran na strateškim smjernicama datim u Strategiji razvoja lokalnih cesta za period 2015-2025. godine. Planom su predviđeni osnovni i specifični ciljevi, očekivani rezultati za svaku pojedinačnu aktivnost sa

mehanizmima praćenja po fazama implementacije, efektivna primjena na terenu, te usklađivanje i korekcija aktivnosti u odnosu na stanje na terenu. Akcionim planom su predviđene aktivnosti i mjere za realizaciju strategije razvoja lokalnih cesta kojom je obuhvaćena 88,83 kilometra rekonstrukcije postojećih lokalnih cesta, izgradnjom 12,6

kilometara novih lokalnih cesta, te izgradnjom 80,92 kilometra pješačkih staza, devet mostova i tri kružna toka. Aktivnosti predviđene akcionim planom doprinjet će razvoju funkcionalnog saobraćajnog sistema na području općine Ilidža koji treba da obezbjedi povećanje kapaciteta saobraćajnica i očekivanog nivoa usluga. ■

Izveštaj o realizaciji Akcionog plana za realizaciju strategije razvoja lokalnih cesta za period 2017-2019. godine

Općinsko vijeće usvojilo je Izveštaj o realizaciji Akcionog plana za realizaciju strategije razvoja lokalnih cesta za period 2017-2019. godine. Realizacija projekata predviđenih ovim planom vršena je u fazama u zavisnosti od raspoloživih sredstava. Planom je izvršena rekonstrukcija i

izgradnja 7,36 kilometara saobraćajnica i izgradnja 7,82 kilometara pješačkih staza za koje je izdvojeno 4.744.949 KM. Prilikom realizacije Akcionog plana bilo je niz problema koji su uticali na vremenski period realizacije projekata, dinamiku, te sam tok realizacije. Najčešći problemi su

se odnosili na uzurpaciju javnih površina, sporo rješavanje imovinsko-pravnih odnosa i uklanjanje nelegalnih objekata, usporen proces prikupljanja dokumentacije za izdavanje građevinske dozvole i nedostatak finansijskih sredstava te je plan djelimično realizovan. ■

Prijedlog Zaključka kojim Općinsko vijeće zahtjeva donošenje novog Zakona o premjeru i registru nekretnina Federacije BiH

Prijedlog Zaključka kojim Općinsko vijeće zahtjeva donošenje novog Zakona o premjeru i registru nekretnina Federacije BiH ili donošenja izmjena i usaglašavanja važećih Zakona o premjeru i katastru nekretnina i Zakona o zemljišnim knjigama, u dijelu koji se odnosi na evidenciju i upis prava vlasništva i drugih stvarnih obligacionih prava na nekretninama, bila je jedna od tačaka dnevnog reda. Općinsko vijeće donijelo je zaključak kojim se zahtijeva od Parlamenta Federacije Bosne i Hercegovine, Vlade Federacije

Bosne i Hercegovine i kao i svih drugih nadležnih organa i tijela, da u skladu sa svojim ovlaštenjima, nadležnostima i dužnostima ulože dodatne napore u cilju neodložnog i konačnog usvajanja Zakona o premjeru i registru nekretnina Federacije Bosne i Hercegovine ili donošenja izmjena i usaglašavanja važećih Zakona o premjeru i katastru nekretnina i Zakona o zemljišnim knjigama. Polazeći od činjenice da je Općina Ilidža u posljednje dvije decenije pretrpjela velike promjene sa aspekta vlasničko - pravnih odno-

sa i u vezi sa nekretninama, kao i samu činjenicu potpune transformacije pravnog režima nekretnina u Federaciji BiH, što za posljedicu ima značajnu neusklađenost faktičkog stanja sa zvaničnim zemljišno – knjižnim i katastarskim evidencijama nekretnina, sve se neposredno reflektuju na našu cijelu lokalnu zajednicu i direktno utiču na potencijalne investicije i privredni razvoj, što sve u svojoj ukupnosti, u značajnoj mjeri, negativno utiče na život, rad i privredu cijele lokalne zajednice, posredno i šire. ■

Prezentovan projekat “Uspostava i održavanje podataka adresnog registra na području općine Ilidža”

U Općini Ilidža je 22. januara 2019. prezentovan projekat “Uspostava i održavanje podataka adresnog registra na području općine Ilidža.”

Adresni registar jeste evidencija svih ulica i kućnih brojeva stambeno-poslovnih objekata na području jedne lokalne zajednice. Adrese su do sada bile evidentirane u analognom obliku, a prednost novih adresnih registara je to što su u digitalnom obliku i koriste tehničke podatke digitalnog katastarskog plana i ortofotogrametrijskih snimaka. Riječ je o zajedničkom projektu u kojem su adresnim brojem označeni svi objekti na području cijele općine, uz uspostavu elektronske baze u kojoj su uneseni svi podaci uključujući i lokacija, svih izgrađenih poslovnih i privatnih objekata. Uspostavljanjem adresnog registra kompletirana je elektronska baza podataka za područje općine Ilidža koja će u narednom periodu biti korištena i uvezana

sa drugim elektronskim sistemima i bazama.

Ovo je CILAP projekt koji se realizira u okviru saradnje između Federalne geodetske uprave za imovinsko-pravne poslove Federacije BiH, Republičke uprave za geodetske i imovinsko-pravne poslove Republike Srpske i Geodetske uprave Kraljevine Švedske „Lantmäteriet“.

Direktorica CILAP Anđa Zimić je rekla kako je osnovni cilj CILAP projekta, putem efikasne zemljišne administracije doprinijeti ekonomskom i socijalnom razvoju, održivom tržištu nekretnina, održivom korištenju zemljišta i pristupanju Evropskoj uniji. Na prezentaciji se obratio Željko Obradović, direktor Federalne geodetske uprave koji je čestitao općini Ilidža na uspješno realizovanom projektu.

“Projekat je zajednički rađen sa švedskom vladom. Čestitam Općini Ilidža koji su svojim kapacitetima uradili ogroman posao.



Više od 40 posto građana je bilo nastanjeno na adresama bb što je loš podatak. Putem ovog projekta koji je rađen dana imat ćemo jedinstvenu bazu podataka uvezanu u sistem katastarske evidencije “dodao je Obradović.

Načelnik Općine Ilidža prof.dr. Senaid Memić izrazio je svoje zadovoljstvo urađenim poslom ističući da struka koja je uradila posao ima najveće zasluge. “Iskreno se nadam da se približavamo Evropi a ja želim da budemo i bolji” naglasio je Memić. ■





Stipendije za 168 učenika i 52 studenta slabijeg imovnog stanja i 40 stipendija za djecu bez roditelja

Općina Ilidža i ove godine stipendirat će učenike i studente slabijeg imovnog stanja i djecu bez roditelja i roditeljskog staranja. Stipendirat će se 168 učenika srednjih škola i 52 studenta. Za ove namjene iz Općine je izdvojeno 178.000 KM.

Stipendirat će se i osam studenata, 10 učenika srednjih škola i 22 osnovca, djece bez roditelja i roditeljskog staranja. Općina će za ovu kategoriju za stipendiranje izdvojiti 38.400 KM

Studenti će dobijati po 100 KM, a 75 KM učenici. Tim povodom načelnik Općine Ilidža prof. dr. Senaid Memić, 24. januara 2019. godine u sali Općine Ilidža svečano je uručio ugovore o stipendiranju djeci slabijeg imovnog stanja i djeci bez oba roditelja i djeci

bez roditeljskog staranja.

„Dodjela stipendija je nešto što je moja najdraža obaveza. To je mala pomoć u vašem školovanju, a ujedno i podrška vašem obrazovanju i investiranje u našu budućnost. Obavezu koju imate da uči-

te nastavite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić. Stipendije će se dodijeliti 10 mjeseci. ■



Prijem za najstarije Ilidžance

I ove godine Općina Ilidža je svim svojim stanovnicima starijim od 80 godina, kojih na području općine ima 2.293 podijelila novčane poklone u iznosu od 70 KM. Za njih tridesetak najstarijih, načelnik Senaid Memić 28. januara 2019. priredio je prijem i druženje u prostorijama Općine.

- Zadovoljstvo mi je što imamo priliku da vas ovim skromnim poklonom bar malo obradujemo, i ukažemo da vas, kao najstarije građane naše općine nismo zaboravili i da je ovo mali znak pažnje u znak zahvalnosti za sve ono što ste uradili za državu, lokalnu zajednicu i za nas mlade. U nadi da ćemo vam bar malo olakšati staračke dane želim vam

puno dobrog zdravlja uz želju da još dugo godina poživite i da se i iduće godine opet vidimo i sretnemo, kazao je Memić u svom obraćanju najstarijim sugrađanima.

Delegacija Općine Ilidža posjetila

je i porodicu Viteškić, Adila i Fehmu u Gornjem Kotorcu, a i najstarijeg Ilidžanca Envera Mrzića, stogodišnjaka koji živi u Otesu. Uručili su im pakete prehrambenih i higijenskih artikala i novčani poklon. ■



U prošloj godini sklopljen 561 brak

Tokom protekle 2018. godine u Općini Ilidža vjenčan je 561 par. Matičari Općine Ilidža vjenčali su 174 para van službenih prostorija, a ostali su svoje sudbonosno "DA" rekli u prostorijama općine. Najviše vjenčanja bilo je u mjesecu septembru i augustu i to po 82. Sklapanje braka u Općini Ilidža je jednostavno, ukoliko se dostavi sva potrebna dokumentacija.

Matičar u dogovoru sa budućim bračnim partnerima određuje datum sklapanja braka, a rok može biti i kraći od 30 dana od dana prijavljivanja namjere sklapanja tog braka. Svi potrebni obrasci za obavljanje vjenčanja u Općini Ilidža su besplatni i dostupni kako na web stranici tako i na Info-pultu Općine. Vjenčanja su besplatna srijedom i subotom u službenim prostorijama općine. Sam čin sklapanja braka se tako-



đer može obaviti i van službenih prostorija Općine. Kada se sklapanje braka odobri izvan službene općinske prostorije, na mjestima kao što su hoteli, restorani, buduća bračna partneri su dužni platiti novčanu naknadu, u iznosu od 400,00 KM.

Sklapanje braka u ovakvim slučajevima vrši se svakog dana u vremenu od 10,00-18,00 sati. Vlasnici ugostiteljskih objekata dužni su obezbjediti prikladnu prostori-

ju sa odgovarajućim uslovima za obavljanje svečanog čina sklapanje braka. Budući bračni partneri koji žele da brak sklope u dane koji posebnim aktom Općinskog načelnika nisu utvrđeni kao dani u kojima se vrši sklapanje brakova u službenoj općinskoj prostoriji, tj. srijedom i subotom, mogu to zahtjevati isključivo u radne dane u vremenu od 10.00 do 18.00 sati uz plaćanje naknade u iznosu od 100KM. ■

Ovjereno 295.924 različitih dokumenta

U Centru za pružanje usluga građanima Općine Ilidža ovjera potpisa, rukopisa, prepisa vrši se svakog radnog dana u vremenu od 8 do 18 sati.

Prema službenoj evidenciji koja se vodi kroz knjigu ovjera, potpisa i rukopisa u toku 2018. godine ukupno je ovjereno 295.924 različitih dokumenata, od čega je 236.125 fotokopije i 59.799 ovjera potpisa. Zbog ovjere različitih dokumenata licima koja nisu u mogućnosti zbog nepokretnosti ili drugog razloga doći u Centar, ovjereno je 352 dokumenata.

Prema evidenciji zaprimljeno je, obrađeno i dato u rad po službama kroz interne knjige ukupno 14.772 predmeta i akta od čega



7.391 upravnih predmeta, 1.543 veze predmeta i 5.838 akata poslovanja.

Treba istaći da je nije rijedak slu-

čaj da se za ovjeru dokumenata obraćaju i građani iz drugih općina, što značajno povećava broj ovjera. ■



Za jednokratne pomoći dato 140.100 KM, a za teško oboljele osobe 110.600 KM

Općina Ilidža je u 2018. godini, na osnovu Odluke o uslovima, kriterijima i načinu dodjele novčane pomoći u participiranju liječenja teško oboljelih lica sa područja ove općine isplatila iz Budžeta 110.600 KM. Komisija za dodjelu novčanih pomoći primila je 149 takvih zahtjeva od čega je obrađeno i isplaćeno za njih 96, a 59 nije ispunjavalo uslove za dodjelu novčane pomoći.

Odlukom Općinskog vijeća Ilidža, a na osnovu kriterija za dodjelu jednokratne novčane pomoći socijalno najugroženijim licima s područja ove općine pozitivno je riješeno 896 zahtjeva. Za te namjene izdvojeno je 140.100 KM.

Komisija je opravdano ocjenila i predložila općinskom načelniku novčane pomoći u iznosima od 50,00 KM do 800,00 KM što je on i prihvatio. ■



Na Ilidži registrovano rekordnih 230.429 gostiju

Iz oblasti privrede, a na osnovu sublimiranih podataka za 2018. godinu u registar za obavljanje djelatnosti pri Općini Ilidža upisano je 637 obrtničkih i 346 trgovačkih radnji, 204 ugostiteljska objekta, 81 taksi prevoznik, 48 autoprevoznika, 34 fijakerista, devet auto škola i 3.111 privrednih subjekata koji imaju sjedište ili poslovnu jedinicu na području općine Ilidža, a koji se registruju u sudu.

U oblasti turizma, a na osnovu podataka Zavoda za informatiku i statistiku u 2018. godini na Ilidži je registrovano rekordnih 230.429 gostiju i 417.947 ostvarenih noćenja koji su realizovani u 31 smještajni objekat sa 2.200 soba i 5.100 ležajeva, što Ilidža svrstava u vodeću turističku destinaciju. ■




Održana Peta sjednica Komisije za sigurnost Općinskog vijeća Ilidža

Komisija za sigurnost Općinskog vijeća Ilidža kao privremeno radno tijelo, 9. januara 2019. godine održala je petu sjednicu na kojoj je pored članova komisije prisustvovao i načelnik Pete policijske uprave Ilidža, Mustafa Bešić. Na sjednici su razmatrane Informacija o stanju sigurnosti i aktivnostima Pete policijske uprave za period juli-septembar 2018. godine, Sporazum o saradnji Općine Ilidža i Pete PU Ilidža i tekuća


pitanja.

U okviru tačke tekuća pitanja donesen je zaključak kojim će Komisija za sigurnost zajedno sa Petom policijskom upravom tokom održavanja Zimskih olimpijskih igara za mlade EYOF (februar 2019. godine) poduzeti sve potrebne mjere kako bi se takmičenje održalo na najvećem sigurnosnom nivou i kako bi naša lokalna zajednica bila uzoran domaćin svim takmičarima. ■



Obilježeno 77. godina od Igmanskog marša

Igmanski marš je jedan od najvažnijih partizanskih pohoda na prostorima bivše Jugoslavije u Drugom svjetskom ratu. I naši predstavnici Udruženja antifašista i boraca NOR-a Ilidža učestvovali su u organizaciji obilježavanja 77 godina od ovog događaja. UAB-NOR-a Ilidža ovoj tradicionalnoj i veoma značajnoj manifestaciji posvetilo je veliku pažnju. Delegacija ovog udruženja je 25. januara 2019. godine položila je cvijeće na spomenike: Vrelo Bosne i u Osijeku. Organizovali su zajedno sa UABNOR-a Hadžići druženje uz večeru i muziku za prijatelje iz Bajine Bašte, Prijepolja, Beograda, Daruvara i Ljubljane. Položeno je cvijeće i 26. januara 2019. godine na spomen obilježju Gubavac, mjestu kuda je krenula Prva Proleter-



ska NOU brigada na put preko Igmana do slobodne teritorije Foče. Prisutnim se obratio Nikola Babić - predsjednik Skupštine UABNOR-a Ilidža koji je istakao da se historija ne smije zaboraviti, a izrazio je zahvalnost Općini Ilidža i svim onima koji im daju

podršku u realizaciji ovog događaja.

Centralnom obilježavanju 77. godišnjice Igmanskog marša prisustvovalo je, prema procjenama organizatora oko 15.000 osoba, koji su na Veliko polje uglavnom stigli autobusima. ■

Pravo na dječiji dodatak ostvarilo je 1.761 korisnika

Zaštita porodice sa djecom regulisana je u skladu sa važećim zakonskim propisima. Vodeći se tim propisima u Općini Ilidža

1.257 korisnika je dostavilo dokaze za ostvarivanje prava na dječiji dodatak i 504 novih. Tako da je u 2018. godini u Općini

Ilidža 1.761 korisnika ostvarilo je prava na dodatak na djecu. Za jednokratnu pomoć za opremu novorođenog djeteta i priznavanja prava na pomoć u prehrani djeteta do šest mjeseci i dodatne ishrane za majke dojilje podneseno je 117 zahtjeva. Od toga pozitivno je riješeno 89. Kad je riječ o priznavanju prava na naknadu umjesto plaće majci u radnom odnosu za vrijeme odsustva s posla zbog rođenja i njege djeteta primljeno je 479 zahtjeva. Putem resorne službe riješeno je 473 pozitivno zahtjeva, a za majke koje nisu u radnom odnosu od primljenih 383 zahtjeva pozitivno je riješeno 374 zahtjeva. ■





Obavještenje za poljoprivredne proizvođače

Na osnovu upozorenja Tima za registar poljoprivrednih gazdinstava i registra klijenata Federalnog ministarstva poljoprivrede, vodoprivrede i šumarstva, obavještavaju se poljoprivredni proizvođači da vrijeme promjena, odnosno ažuriranja podataka na poljoprivrednom gazdinstvu,

koje se bavi animalnom i/ili biljnom proizvodnjom, je od 01.01. do 31.03., kao što je propisano Pravilnikom o upisu u registar poljoprivrednih gazdinstava i registar klijenata, a sva poljoprivredna gazdinstva koja naknadno urade ove promjene neće moći aplicirati za novčane podrške u

2019. godini.

Svi klijenti koji se prvi put upisuju u registar poljoprivrednih gazdinstava i klijenata, a apliciraju za novčane podrške u 2019. godine, također se trebaju upisati u navedenom roku od 01.01. do 31.03. ove godine. Klijenti koji žele uraditi promjenu organizacionog oblika, trebaju to učiniti u tom vremenskom periodu, jer sve naknadno urađene promjene organizacijskog oblika poljoprivrednog gazdinstva neće se uzimati u obzir za novčane podrške u ovoj godini.

Upisi i prijave promjena na gazdinstvu, podnose se u prostorijama Općine Ilidža, Služba za privredu i turizam, soba 324 – III sprat. Kontakt telefon: 033/775-753. ■



Budimo domaćini za primjer takmičarima EYOF-a

Evropski omladinski festival mladih (EYOF - European Youth Olympic Festival) predstavlja najveći sportski olimpijski festival za mlade sportiste starosne dobi između 14 i 18 godina. Zimski i ljetni festival organizuju se svake dvije godine. Domaćin zimskog omladinskog festivala EYOF 2019 su gradovi Sarajevo i Istočno Sarajevo, a održat će se od 9. do 16. februara 2019. EYOF će, kako se očekuje, okupiti više od 1.500 učenika iz oko 50 evropskih država koji će se natjecati u zimskim sportovima na nekoliko borilišta u Sarajevu i Istočnom Sarajevu. Senahid Godinjak, direktor EYOF-a 24. januara 2019. godine u Općini Ilidža prezentovao



je članovima Kolegija Općinskog vijeća Ilidža i vijećnicima planirane aktivnosti ovog sportskog festivala, ističući da će sjedište takmičara biti na Ilidži, a ujedno najavivši i događaje svake večeri na Ilidži. Vijećnici Općinskog vijeća Ilidža izrazili su svoje zadovoljstvo, a ujedno i čast, jer će sjedište ta-

kmičara biti na Ilidži, naglasivši da Ilidža kao lokalna zajednica će ponuditi iz svog domena ponuditi podršku što svečanijoj organizaciji EYOF-a. Budimo domaćini za primjer takmičarima EYOF-a i pošaljimo u svijet lijepu sliku Ilidže, poručili su vijećnici Općinskog vijeća Ilidža. ■



Humanost na prvom mjestu

Općinska organizacija Crvenog križa Ilidže građanima u stanju socijalne potrebe podijelila je pakete pomoći. Ovo je redovna aktivnost Crvenog križa, kojom se trude obuhvatiti sve one kojima je pomoć zaista potrebna. U mjesecu januaru uručeno je deset paketa sa hranom i higijenskim potrepštinama. ■

Besplatan prijevoz za 188 učenika

Općina Ilidža potpisala je sporazum s Ministarstvom saobraćaja Kantona Sarajevo na osnovu kojeg će se osigurati besplatan školski prijevoz za osnovce i srednjo-

školce u drugom polugodištu ove školske godine. Prijevoz je obezbijeđen za 188 učenika Prve osnovne škole sa područja Stupa II i Stupskog brda. ■



Finansira se prijevoz 70 učenika i studenta sa poteškoćama u razvoju

Općina Ilidža je i u drugom polugodištu učestvovala u finansiranju prijevoza za oko 70 učenika i studenata sa poteškoćama u kretanju i njihovih pratilaca. Ova aktivnost realizuje se u saradnji

sa Ministarstvom obrazovanja i Ministarstvom saobraćaja Kantona Sarajevo već šestu godinu. Za ove namjene iz Budžeta izdvojeno 17.000 KM, za drugo polugodište. ■

Škola pčelarstva

Udruženje pčelara „BEHAR“ Ilidža organizovalo je školu pčelarstva koja je počela 10. januara 2019. godine i održavala se ponedjeljkom i četvrtkom u prostorijama udruženja u ulici Mala aleja broj 40. Škola je bila besplatana i namijenjena je pčelarima početnicima s ciljem sticanja osnovnih i novih znanja iz oblasti pčelarstva. Škola je trajala 40 sati na kojoj su prisustvovali svi zainteresovani budući pčelari. ■



Za đacke užine izdvojeno 40.000 KM

Općina Ilidža je i u drugom polugodištu školske 2018/2019. finansirala đacke užine za oko 250 učenika slabijeg imovnog stanja u deset osnovnih škola sa područja ove općine, kao i za učenike Katoličkog školskog centra „Sveti Josip“ –Stup. Za ove namjene iz Budžeta Općine za školsku 2018/2019. izdvojeno je 40.000 KM. ■



Sjećanje na početak genocida nad Bošnjacima

U organizaciji Udruženja boraca „Branitelji Stupa“ i „Zelene beretke“ 9. januara na platou ispred Općine Ilidža, na Centralno spomen obilježje šehidima i poginulim borcima učestvovao je Fatih i polaganjem cvijeća obilježen je početak genocida nad Bošnjacima, te odata počast šehidima, poginulim borcima i svim žrtvama genocida u odbrambeno-oslobodilačkom ratu 1992-1995. Cvijeće su položili delegacije Općine Ilidža, boračkih udruženja i političkih partija. ■

IN MEMORIAM

Miroslav Močević - Moća

U Sarajevu je 21. januara 2019. godine nakon teške bolesti u 65. godini umro Miroslav Močević, Moća.

Močević je rođen 17. februara 1954. godine u Sarajevu. Osnovnu i Srednju mašinsko-tehničku školu završio je u Sarajevu. Prije rata radio je u Energoinvestu, a tokom rata Miroslav Močević bio je pripadnik 102. motorizovane brigade.

Bio je vijećnik Općinskog vijeća Ilidža od 1998. do 2000. godine, a od 2000. do 2004. godine predsjedavajući Općinskog vijeća Ilidža. Bio je u prelaznom sa-

zivu Skupštine Kantona Sarajevu, zastupnik od marta 1996. do oktobra 1996. Močević je dobio 2014. godine Srebrnu plaketu Općine Ilidža za doprinos u odbrani zemlje, te aktivno učestvovao u razvoju svoje lokalne zajednice. Bio je aktivista u omladini, izviđačima i nevladinim organizacijama.

Jedan je od ljudi koje smo poštovali i voljeli. Ostat će upamćen kao konstruktivan političar, koji je svojim političkim angažmanom trudio se i stvarao ambijent integracije Ilidže, a i cijele BiH, koju je nosio u srcu. Moče-



vić je bio patriota, demokrata i veliki čovjek. Otac tri kćerke. Miroslav Močević sahranjen je u četvrtak 24. januara u 13 sati na pravoslavnom groblju u Osjeku.

